

Deventâ infermîr? Une oportunitât contade dai fantats di YoupaTubo

Cul gnûf video sul canâl promovût de ARLeF, i youtubers furlans a tornin a fevelâ cun semplicitât di un teme di grande impuartance sociâl

I fantats dal canâl furlan “YoupaTubo” di YouTube a tornin a fevelâ intal lôr ultin video di un teme cuntun valôr sociâl une vore fuart, invidant i zovins come lôr [a rifleti su la oportunitât di deventâ infermîr](#). Par podê fâ cheste profession si à di seguî un percors di studis une vore diferent di chel di une volte e che, cu la Universitât dal Friûl, al permet di imparâ ancje midiant di un centri di simulazion di avanguardie.

La clip e tache cun Mattia Cantarutti e Federico Iob (Chei di Udin) che, cuntun mateç simpatic, a introdusin par prins chest argoment. Daûr, Desiree Chiappo Debegnach e met subit “ordin” e e rimarche la impuartance de figure professionâl dal infermîr; po dopo a intervegnin Federico Benedet, Davide Buccheri e Lucia Bello. Chescj zovins youtubers, cun chei altris compagns di “aventuris”, a son i protagoniscj dal canâl là che a contin lis lôr passions, fevelant in lenghe furlane di contignûts e curiositâts dal Friûl.

«I fantats di YPT a àn dât un messaç cun contignûts impuartants e intune forme plasevule. Ancje cheste volte, cun simpatie e snait, a àn evidenziât un teme fundamentâl pal nestri teritori: la formazion dai infermîrs. Midiant dal dialic continui tra la ARLeF e la Universitât dal Friûl – che e à dât un contribût tecnic fundamentâl sostignint cun convinzion la realizazion di chest gnûf video – al è stât pussibil meti adun un filmât che al atire la atenzion dai nestris zovins. O ringracii il professôr Bresadola, coordinadôr dal cors di Lauree in infermieristiche, e il Retôr Pinton par cheste colaborazion gnove che, come lis precedentis, e puatarà beneficis, no dome pe comunitât furlane». Cussì al à dit Eros Cisilino, president de ARLeF - Agenzie regjonâl pe lenghe furlane, che e poie il proget realizât cu la colaborazion de Universitât dal Friûl, dal Centri di Simulazion e Alte Formazion, dal Dipartiment di Medisine de Universitât dal Friûl e dal Cors di Lauree in infermieristiche, sedis coordinadis di Udin e Pordenon.

Lis fantatis e i fantats di YoupaTubo, nus fasin capî ben che “infermieristiche” al è un dai percors universitaris plui dynamics. E je une laurea trienâl (la prove di amission e sarà ai 5 di Setembar dal 2024), che è permet dopo di iscrivisi tal ordin des professions infermieristichis, e di tacâ a lavorâ intal setôr public, o tal privât, sul teritori e inte assistance. «O soi une vore content dal contribût dai zovins di YoupaTubo che, cun chest video, a rivaran dal sigûr a rinfuarcî in mò di plui il procès di divulgazion su la impuartance de profession di infermîr.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Di fat, o crôt che al sedî un imprest une vore bon par fâ rivâ chest messaç ai zovins, ma ancje a chei mancûl zovins. O volaressin ancje rivâ a aumentâ il reclutament dai students futûrs di infermieristiche, che intai ultins agns al è stât plui dificil, come che al sucêt par dute la aree di medicine e sanitarie», al à marcât il professôr Vittorio Bresadola, coordinadôr dal cors di Lauree in Infermieristiche de Universitât dal Friûl a Udin e a Pordenon.

Forsit no ducj a san che za a tacâ dal prin an, lis lezions in aule si alternin cui laboratoris dal centri di simulazion di avanvuardie. In plui, si fasin tirocinis sul teritori o pûr in Europe cul Erasmus+ Traineeship (cu la pussibilitât di borsis di studi). E je une siele di vite che e da une vore di cognossincis e competencis, midiant tecnichis di aprendiment simpri plui modernis e dal contat diret cu la realtât professionâl.

Udin, ai 19 di Avost dal 2024

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<